

TUSI TAIALA

**MO LE PULEA TATAU MA LE VA'AIA LELEI O
I'A MA FIGOTA O LE GATAIFALE**

O LE AFIOAGA O



SAUNIA:

Pule mamalu a Alii ma Faipule ma tagatanuu o le Afioaga o Fagamalo ma le Lagolagosua a le
Vaega o Faigafaiva,
Matagaluega o Faatoaga ma Faigafaiva

FAASOLOGA

1	UPU TOMUA	1
1.1	Autu o le Taiala.....	1
2	TULAFONO AUTU O FAIGAFAlVA	2
2.1	Tulafono Faatonutonu o Faigafaiva (mo le Laiti o l'a ma Figota).....	2
2.2	Tulafono Laiti a Afioaga.....	2
3	FAAMATALAGA E UIGA I LE AFIOAGA	2
3.1	Gataifale o Fagamalo.....	3
4	FAIGAFAlVA I LE AFIOAGA ma FAAFITAUlI	3
4.1	Ituaiga Faigafaiva ma l'a Maua.....	4
4.2	Aotelega o Tulafono Faale-nuu tau Faigafaiva i Aso ua Mavae.....	4
5	O LENEI FUAFUAGA TATAU/TAIALA	5
5.1	Tapenaga.....	5
6	FUAFUAGA FAATAATITIA ma TULAFONO	6
6.1	Ia Faamalosia Tulafono Faale-nuu e Faasaina ai Faigafaiva le Talafeagai.....	6
6.2	Faasaina Upega ma Tili Matanini'i.....	7
6.3	Ia Faasaina le Fagotaina o l'a ma Figota Laiti.....	8
6.4	Suesue Tulaga Talafeagai o le Gataifale mo le Faia o se Ogasami Faasao.....	9
6.5	Suesueina le Tulaga Talafeagai o le Gataifale mo le Tufaina atu ma le Faatoagaina o l'a ma Figota.....	10
6.6	Ogasami Faatagaina mo le Fagotaina o le Matalelei/Matamalū.....	11
6.7	Taofia le Faatafunaina o le Gataifale: Faasaina le Lafoai o Otaota ma Lاپisi i le Matafaga ma le Sami.....	12
6.8	Ia Aoina ma Faatama'ia Alamea.....	13
6.9	Una'ia Faigafaiva i Tua'au ma Faia Aoaoga mo Faigafaiva.....	14
6.10	Faasalalauina Tulafono a le Afioaga.....	14
7	UPU MULIMULI	15
8	SUI AUAI I FONOTAGA MA FAATALATALANOAGA	15

Fa'alupega o le Afioaga

1 UPU TOMUA

O faigafaiva i gataifale o Samoa e taua tele aua le fofoga taumafa aemaise lava i afioaga i tua. I le tele o afioaga, latou te le o faatauaina le pulea tatau ma le vaaia lelei o punaoa ma le siosiomaga o le gataifale. O le faia ma le faaogaina o ituaiga faigafaiva faa-onapo-nei e i ai mea manava, upega ma tili mataninii e faamata faigofie ai ma tele ai i'a maua ae o loo faaitiitia ai le tamaoaiga o le gataifale. O nisi o atinae ma galuega faatino ua faaleagaina ma faatamaia ai le tele o nofoaga ma meaola o le sami e pei o:-

- le tanumia o vaega o le gataifale mo eleele-fou (fanua);
- faigafaiva le talafeagai pei o fanaia, ava niukini, vailaau oona ma faamo'a/tuiga.

O nei faafitauli o loo tulai mai pea i gataifale o si o tatou atunuu, ua matua faaitiitia ai i'a ma figota ae le gata i lea o aafiaga i mala faanatura e pei o galu malolosi faapea matagi ma afā ua tuanai e pei o Ofa 1990, Val 1991 ma Heta 2004.

O i'a ma figota o le sami sa faamoemoe iai le fofoga taumafa o tagata Samoa, ae ona o faafitauli pei ona taua ua faatamaia ma faaitiitia ai nei punaoa o le sami ua tele ai ina taugata ai, faapea le faamoemoe o tagata Samoa i meaai tuu aisa ma meaai tuuapa o lo o faatauina mai atunuu i fafo. O se atugaluga lea o lo o iai i le taimi nei ae le gata i lea o le faamoemoe tele i le tupe aua mea taumafa i aso uma.

O le polokalame o le faasao ma pulea tatauina o le gataifale o Samoa na amata mai e le Ofisa o Faigafaiva i le tausaga 1995 i le faatupega mai le Malo Ausetalia (AusAid) mo le lima tausaga. E faataua ai le fesootaiga ma le galulue soosoo tauau ma afioaga aua le faatuina o latou ogasami faasao. O tualumaga o le polokalame e aofia ai le soalaupuleina ma le fausiaina o se Tusi Taiala e tamauina ai fuafuaga faataatitia a le afioaga faapea le Ofisa o Faigafaiva.

O se tasi o autu taua o lenei polokalame o le toe tapu'e mai lea o tamaoaiga ma faaoga tatau punaoa o le gataifale ma le sami ina ia maua pea aua tupulaga lalovaoa o Samoa. O le puleaina ma le lelei o lenei polokalame faasao i nuu, e i lima ma aao o afioaga lava o lo o faaogaina nei punaoa ma tamaoaiga.

O fuafuaga faataatitia i lenei Tusi Taiala e unaia ai le vaaia lelei aemaise le pulea ma le fuafua tatau o le faaogaina o le tamaoaiga o le gataifale o Fagamalo i Savaii.

1.1 Autu o le Taiala

O le autu leni sa faatalatalanoaina ma malilie autasi i ai vaega uma o le afioaga o Fagamalo:

- la vaaia lelei ma pulea tatau le siosiomaga o le gataifale ;
- Toe faatupulaia punaoa ma tamaoaiga o le gataifale mo tupulaga i le lumanai.

2 TULAFONO AUTU O FAIGAFAlVA

O le Tulafono Autu o FaigafaiVa, 1988 ua avea ma taiala mo puiPuiga, galuega ma isi vaega tau faigafaiVa ma le sami e pei:-

- o le faasaina, puleaina ma le atina'eina;
- faasaina o le faia o faigafaiVa le talafeagai;
- faamalosia le laiseneina o vaa fagota mo fagotaga faapea le
- vaaia o taiala ma maliega aua le pulea tatau o faigafaiVa i le va ma atunuu i fafo.

O nei tulafono uma e le o lava le silafia e le toatele o tagatanuu o Samoa aemaise le faamalosia e afioaga. Ona o nei faafitauli ua taumafai ai le Polokalame Faasao o le Gataifale mo Afioaga e unaia nisi o vaega o loo faatinoina nei e pei o aoaoga faapea le fesoasoani tele i le faamalamalamaina mo le silafia e le mamalu o le atunuu o ia tulaga.

2.1 Tulafono Faatonutonu o FaigafaiVa (mo le Laiti o l'a ma Figota)

O le Tulafono Faatonutonu o FaigafaiVa 1995, e faatapulaaina ai le laiti o l'a ma Figota e fagotaina ma faapea ona faatauina ai nisi o vaega e pei o:-

- āiāiga mo le puiPuiga ma le faasaina e aofia ai le faasaina ona fagotaina ma le faatauina o nisi o ituaiga o l'a ma figota;
- mea fagota e faasaina;
- pole mo fagotaga (faigafaiVa i tuaau);
- fua faatapulaa o l'a ma figota e faatagaina ma isi.


2.2 Tulafono Laiti a Afioaga

O Tulafono Laiti a nuu ma afioaga ua amanaiaina e le Faamasinoga. O se tasi lea o auala ua tuu sa'o ai e le Malo le malosi i nuu ma afioaga e mafai ai ona latou molia i le tulafono soo se tagata e le usitaia tulafono ua āiāia i totonu o le Tusi Taiala a lea afioaga. O nei tulafono o loo i lalo o le vaega o Tulafono ma Faasalaga o le Tusi Taiala aua le pulea tatau ma le vaaia lelei o le gataifale i tulaga o ona tamaoaiga ma lona siosiomaga mo se lumanai manuia. O tulafono laiti e soalaupule ma autasi iai le pule mamalu a alii ma faipule o afioaga lava.

3 FAAMATALAGA E UIGA I LE AFIOAGA

O le afioaga o Fagamalo e i le ogatotonu i matū o le motu o Savai'i (vaai i le faafanua) i le itumalo o Gagaemauga III.

Ata 1: Faafanua o Savaii o lo o faailoa mai ai le afoaga o Fagamalo



Vaega Faufautua (Ofisa Faigafaiva, 2008)

O le faitau aofai o tagata o le afoaga o Fagamalo e i le va o le 300 i le 400 (Ofisa o Tusigaigoa, 2001) e le o aofia ai i latou ua faimalaga atu ma aumau i Niusila, Ausetalia, Amerika ma isi atunuu i fafo. I totonu o le afoaga, o le toatele o tagata e nonofo latalata i le sami.

O Fagamalo e mamalu ana pulega aua e puleaina lava e le Fono a Alii ma Faipule o le afoaga. O le aumaga e lava saunia i taimi uma aua le tautuaina o matai faapea tina latou te avatua fautuaga lelei mo ni mataupu tau lotoifale o le afoaga.

3.1 Gataifale o Fagamalo

O le afoaga o Fagamalo e tu matafaga ma e gatasi maualalo lona laufanua. O lenei afoaga e iai lona a'au pe a ma le 1,000 mita le umi. O le mamao o le a'au mai le matafaga pe tusa ma le 500-700 mita. E ola lelei amu i lona aloalo e pei ona lipotia e le Vaega o Faigafaiva i lalo o le Polokalame a le Lalolagi mo le Mata'itūina o Amu ma Aau (GCRMN).

Ona o le gatasi ma le lau oneone o le matafaga ma gataifale o Fagamalo, e iai mataaga ma faletalimalo (Lagoto Resort) e faaogaga e nonofo ai tagata tafafao (turisi).

4 FAIGAFAlVA I LE AFIOAGA ma FAAFITAUl

I le faatinoga o faigafaiva i le afoaga, o alii e faatinoina fagotaga mauu i le aloalo aemaise tua'au, pe a ma le 15 -20 faifaiva e fagotaga pe ta'i faatasi i le faatolu i le vaiaso. I fagotaga i tuaau a alii, e tele ina faaogaina ai paopao. I fagotaga a le itupa o tamaitai, pe a ma le 7-15 i latou e fagotaina figota ma isi taumafa o le sami.

4.1 Ituaiga Faigafaiva ma l'a Maua

O nisi nei o ituaiga faigafaiva eseese o lo o faatinoina mo le fofoga taumafa o aiga, faalavelave i totonu o le afioaga ia po o le faatau foi mo tupe maua. O ia fagotaga e iai le:-

- Maulu ma le matatao/mata;
- Afaloloa;
- Seuseuga;
- Faogātuitui;
- Aoina o alili, aliao, sisi ma isi figota i le aloalo ma luga o le a'au o lo o faatinoina e tina, tamaitai ma le fanau.

O le tele o i'a sa maua i aso ua mavae ua faigata ona maua i aso nei, ae a maua foi ua faaitiitia le faitau aofai faapea le lapopoa. O i'a ta'atele i le aloalo e iai:-

- Lo/pa'u'ulu;
- Pone ma alogo;
- Ili'ilia, Ume;
- Filoa ma isi.

E maua sisi, tuitui, vaga, fugafuga, loli ma isi figota. E iai foi figota i le gataifale ua vaaia le faaitiitia o le faitau aofai aemaise o le tele o ni itula e faaaluina mo fagotaga pe'a faatusatusa i le tele o tausaga ua mavae. O nisi o figota ua faaitiitia ma ua faigata ona maua e iai:

- faisua;
- aliao ma alili.

O faafitauli ma suiga ua iai nei gataifale o Fagamalo e pei ona ta'ua, o le āia o le gataifale i galu malolosi ma afā faapea le faaitiitia o i'a maua ma figota sa tele i aso ua mavae ona o le soona fagotaina ma le faaaogaina o faigafaiva le talafeagai e pei o fanai'a, ava niukini, tu'iga ma isi. O le popolega o le afioaga ona o le tele o nei faafitauli i le gataifale o lo o faamoemoe iai le fofoga taumafa e le gata mo le taimi nei ae i le lumanai. O lea ua a'e ai se tofa i alii ma faipule ina ia pulea tatau ma vaaia lelei punaoa ma alamanuia o le gataifale.

4.2 Aotelega o Tulafono Faale-nuu tau Faigafaiva i Aso ua Mavae

O Fagamalo, e i ai ana tulafono i aso ua mavae ma o lo o faaauuina pea ma mamalu i le pulega a alii ma faipule. O ia tulafono e matua faasaina lava faigafaiva le talafeagai e pei o:

- Fanaia;
- Ava niukini;
- Vailaau oona;
- Faamo'a/Tu'iga;
- Faaogaina faatasi o tane mauu ma moliuila i lama (scuba gears) pei ona matua faasaina i tulafono o faigafaiva.

Ua faasaina foi tagata mai isi afioaga ona toe fagotaina gataifale o Fagamalo. E ui lava ina ua i ai tulafono e pei ona taua, ae le o atoatoa lona faatinoina ma lona va'aia ona o le lē aloaia e le 'au faifaiva mai isi afioaga. O le isi itu o le mamao lea i tai o nofoaga o loo faatinoina ai isi ituaiga o faigafaiva atoa ai ma auala o loo faaaogaina.

O nei tulafono o loo āiāia malosi i tulafono autu o faigafaiva ma amanaia e le pulega mamalu a alii ma faipule o Fagamalo ma le faamoemoe ina ia toe faamalosi atili.

5 O LENEI FUAFUAGA TATAU/TAIALA

E taua le fuafua lelei ma tulimata'i le sini autu o taumafai le mamalu o le afioaga e faataunuuina. O le faamoemoe maualuga o le Malo, ina ia faaleleia le soifua manuia o tagata o le afioaga ma ia faatupulaia atili mea taumafa mai le sami. O lea e manaomia ai le pulupululima o tagata uma o le afioaga i soo se faatinoga lelei e le gata e tua iai ae maua ai lo latou tamaoaiga. E pei ona ta'ua i le amataga, o le **AUTU** na talanoaina ma autasi uma iai finagalo o vaega taitasi o le afioaga i taimi o faatalatalanoaga:

- ✚ la pulea tatau ma vaaia lelei le siosiomaga o le gataifale;
- ✚ Toe faatupulaia punaoa ma tamaoaiga o le gataifale aua tupulaga i le lumanai.

5.1 Tapenaga

O lenei tapenaga sa saunia lava e le Fono a Alii ma Faipule ma tagatanuu o Fagamalo, faatasi ai ma le lagolagosua a le Ofisa o Faigafaiva. O se ootoga lenei i le tapenaga o lenei Tusi Taiala ina ua maea ni fonotaga sa faia pei ona faamatalaina atu i lalo.

5.1.1 Feiloaiga Muamua a le Afioaga ma le Ofisa o Faigafaiva

Sa faato'ai mai ai le finagalo o alii ma faipule i le Ofisa o Faigafaiva e faailoa mai ai lo latou fia auai i le Polokalame mo le puipuiga ma le faasaoina o gataifale i le aso 28 o Fepuari, 1997. O le Aso 7 o Mati 1997, sa faia ai loa se fonotaga muamua a le Ofisa ma le afioaga e faamalamalamaina ma taliaina ai le polokalame. O le maea o lenei feiloaiga muamua na taliaina lelei ai e le afioaga le polokalame ma faamautuina ai le aso mo faatalatalanoaga ma vaega e tolu o le afioaga.

5.1.2 Faatalatalanoaga ma Vaega o le Afioaga

O le faatinoga o faatalatalanoaga sa vaevaeina ai le afioaga i vaega e tolu o matai, aumaga ma tamaitai, ma sa faatautaia e le Ofisa o Faigafaiva mataupu taua i ia talanoaga. O nei faatalatalanoaga na mafai ai ona aoina mai ai manatu ma faamatalaga i faigafaiva, faafitauli o le gataifale aemaise ni fōfō e foia ai. E le gata i lea, o matafaioi a le afioaga i le faatinoina o galuega faapea matafaioi a le Ofisa o Faigafaiva e fesoasoani ai i le atinae Faasao o le Gataifale a le afioaga.

5.1.3 Komiti Faufautua o le Faasao

O le fonotaga a le Komiti Faufautua o le Faasao a le afioaga i le aso 9 Aperila 1997 sa iloiloaina ai le ata o lenei Tusi Taiala. O lenei Komiti Faufautua sa filifilia ai sui e ta'i tolu mai i vaega o matai, tina ma aumaga. O le matafaioi a le Komiti Faufautua o le tuufaatasia lea o faamaumauga ma faamatalaga sa aoina mai i faatalatalanoaga e pei ona ta'ua i luga.

5.1.4 Pasiaina o le Tusi Taiala i le Fono Mulimuli

O le fonotaga mulimuli i le 17 o Aperila 1997 na talanoaina ai lenei Tusi Taiala sa tuuina aloaia i le fono a Matai e sui o le Komiti Faufautua ma le Ofisa o Faigafaiva mo le pasiaina.

O lenei foi fono na faailoa ai sui filifilia o le 'Komiti o le Faasao' e taita'ia le faagaioiga o fuafuaga ua uma ona fa'ata'atitia. O le faagasologa atoa o nei fuafuaga fa'ataatitia e aofia ai vaega e faatautaia e le afioaga faapea fuafuaga e faatautaia e le Ofisa o Faigafaiva e lagolagosua ai i le Faasao o le Gataifale a le afioaga.

6 FUAFUAGA FAATAATITIA ma TULAFONO

O fuafuaga faataatitia o ni gaioiga ua faamoemoe e tatau ona foia ai faafitauli ua faaalua ma faailoa mai e vaega eseese o le afioaga. E lua vaega o fuafuaga faataatitia ua fuafuaina:-

- Fuafuaga faataatitia ua faaāgaāga e faatino e le afioaga;
- Fuafuaga faataatitia mo le Ofisa o Faigafaiva lea e patino lava i le tuuina atu o fautuaga mo le FAASAO a le afioaga.

O fuafuaga faataatitia a le afioaga e pito sili ona taua aua e faalagolago i le pulega mamalu a alii ma faipule le maopoopoga o le faatinoga. Ae o galuega uma lava e faatinoina e le Ofisa o Faigafaiva e ao ona faamaonia e le Ofisa Sili Lagolago (Assitant Chief Executive Officer) a le Matagaluega o Faatoaga ma Faigafaiva.

I taimi o faatalalanoaga i vaega taitasi, e tele ni mafuaaga sa faailoa mai ma iloiloaina. Ae o faafitauli ogaoga lava e aofia ai le āia o gataifale; aemaise o le faaititia o i'a ma figota i le aloalo ma a'au o le afioaga o Fagamalo. O fōfō o faafitauli ma auala e foia ai na iloiloaina foi i faatalalanoaga. E le gata i lea sa faailoa mai ai foi ma vaega latou te faatinoina nei galuega.

O nisi o tulafono o ta'ua i lalo a le afioaga e faamamafa ai tulafono autu a le malo e puipuia, faaoga ma pulea tatau ai punaoa ma alamanuia o le gataifale.

6.1 Ia Faamalosia Tulafono Faale-nuu e Faasaina ai Faigafaiva le Talafeagai

O nisi o faigafaiva ua mautinoa e ogaoga o latou aafiaga i le faatamaiaina o le fogatai ma le tele o meaola o le gataifale. O se faataitaiga o nei ituaiga faigafaiva le talafeagai e iai le faaogaina o vailaau o'ona, ava niukini, fanai'a faapea tu'iga poo faamo'a. Ua le gata ina faatamaia ai se vaega tele o le fogatai ae ua faapena foi ona faaumiumi se taimi e mafai ai ona toe faatupuina le tele o meaola o le gataifale ua aafia i nei ituaiga o faigafaiva.

Fuafuaga Faataatitia a le Afioaga

Ua faailoa mai e le pule mamalu a alii ma faipule le malosi o puipuiaga a le afioaga e faamamalu ai tulafono ua faataatitia. Ma sa faatalanoaina i le fonotaga a le Komiti o le Faasao i le Aso 9 o Aperila 1997 le toe faamalosia ma unaia e le Komiti o le toe faasalalauina o tulafono ina ia malu puipuia ai tulaga o le atinae aemaise o le ogasami faasao.

Na talosagaina e le Komiti le malosi o le nuu (aumaga) atoa ma tagata lautele ina ia vele ese ma faatamaia le laau o le ava niukini o lo o ola i laufanua ma eleele o le afioaga ina ia le toe faaaogaina ai ini faigafaiva.

Sa ta'ua foi e le Komiti, faatumauina pea ma faamalosia tulafono o lo o iai a le afioaga mo le faasaina o faigafaiva le talafeagai.

6.1.1 Tulafono

Mo tagatanuu o Fagamalo faapea tagata mai isi afioaga:-

“Ua matua faasaina lava faigafaiva le talafeagai e pei o fanai’a, ava niukini, vailaau oona faapea tu’iga/faamo’a i gataifale o Fagamalo.”

O le puipuiga ma le faamamaluina o lenei tulafono o le a i aao o alii ma faipule ma le lagolagosua a le afioaga.

6.1.2 Faasalaga

Mo soo se tagata o Fagamalo e maua ua ia solia lea tulafono, o le a tuuina atu i a’ao o alii ma faipule, ae mo tagata mai isi afioaga, o le a molia sao i *Tulafono Autu o Faigafaiva, 1988*.

Fuafuaga Faataatitia a le Ofisa o Faigafaiva

O le a fesoasoani le Ofisa o Faigafaiva mo le faatinoina o fuafuaga faataatitia i lalo o lenei polokalame o Faasao o le Gataifale. E le gata i lea ae o le tuuina atu o faamatalaga ma fautuaga mo le faamautuina o fuafuaga, atoa ai ma le faasalalauina o nei tulafono a le afioaga.

6.2 Faasaina Upega ma Tili Matanini’i

O le talanoaina o upega i le fonotaga i le Aso 9 o Aperila 1997, na ioeina ai e le Komiti le faaaogaina loa o le Tulafono Faatonutonu mo Faigafaiva 1995. O lenei tulafono o lo o aofia ai matāupega mo upega ma tili faapea pa i’a e faatagaina i fagotaga.

Fautuaga

Sa fautuaina e le Komiti le Ofisa o Faigafaiva ina ia taofia le faatauina mai e le Faleoloa o Faatoaga o upega mata nini’i, ae peitai sa faaalua e le Ofisa o Faigafaiva e le mafai ona faia lea tulaga i le taimi nei ona o nei upega o lo o faaaogaina i isi galuega e pei o togalaau aina atoa ai ma isi atinae e puipui mai ai i iniseti faalafua.

Sa faaalua e le Ofisa o Faigafaiva o loo iai tulafono a le Malo ua maea ona pasiaina e faatatau i le faaaogaina o nei upega mo fagotaga ma ua faamalosia nei foi e le Malo faasalaga mo soo se tasi e solia lenei tulafono.

O lea ua finagalo ai le Komiti ina ia aveia tulafono a le Malo o lo o iai nei e fai ma tulafono a le afio’aga e uiga i upega ma tili matanini’i.

6.2.1 Tulafono

Mo tagatanuu o Fagamalo faapea tagata ese mai isi afioaga:-

“Ua matua faasaina lava ona toe faaogaina matāupega e i lalo ifo o le 2 inisi pe 50mm (fua sūsū), i gataifale o le Fagamalo.”

“Ua matua faasaina foi ona toe faaogaina upega tolomatu ma tili e i lalo ifo o le 1.2 inisi pe 30mm (fua sūsū) i gataifale o le afioaga.”

O le pui puiga ma le faamamaluina o lenei tulafono o le a i aao o le pule a alii ma faipule ma le afioaga.

6.2.2 Faasalaga

Mo soo se tagata o Fagamalo e maua ua ia solia le tulafono, o le a tuuina atu pea i a’ao o Alii ma Faipule, ae mo tagata mai isi afioaga, o le a molia sao i *Tulafono Autu o Faigafaiva, 1988*.

Fuafuaga Faataatitia a le Ofisa o Faigafaiva

O le a fesoasoani le Ofisa o Faigafaiva e ala atu i le Polokalame o Faasao mo afioaga ma tuuina atu faamatalaga ma fautuaga e faamalamalama ai tulafono autu i le afioaga.

6.3 Ia Faasaina le Fagotaina o l’a ma Figota Laiti

O leni fuafuaga tataua e taua mo i’a ma figota laiti ia latou maua ai se avanoa e fanafanau ai ae le’i fagotaina mai e le aufaifaiva. Aua afai ae fagotaina mai i’a ma figota laiti ae le’i o’o i le lapopoa/matutua e fananau ai o lona uiga ua le mafai ona fanafanau mai ai nisi i’a ma figota o le sami ina ia faatupulaia ai ia punaoa. Afai o le a faaauuina pea lea tulaga, o le a saga faaititia ai le faitau aofai o i’a ma figota o le sami.

Fuafuaga faataatitia a le Afioaga

Ua faaalua le lagolagoina e le afioaga o Tulafono Faatonutonu o Faigafaiva ua pasiaina o lo o āiāiā ai fua faatupula’a mo le laiti o i’a ma figota e tataua ona fagotaina mai.

6.3.1 Tulafono

Mo taganuu o Fagamalo faapea ai faifaiva mai isi afioaga:-

“Ua faasaina ona toe fagotaina i’a ma figota laiti mai le gataifale o Fagamalo, e pei ona faaalua i le Tulafono Faatonutonu o Faigafaiva a le Malo”.

O le pui puiga ma le faamamaluina o leni tulafono o le a i aao o alii ma faipule ma le afioaga o Fagamalo faapea le lagolagosua a le Vaega o Faigafaiva.

6.3.2 Faasalaga

Mo soo se tagata o Fagamalo e maua ua ia solia lea tulafono, o le a tuuina atu pea i a’ao o Alii ma Faipule, ae mo tagata mai isi afioaga, o le a molia sao i *Tulafono Faatonutonu o Faigafaiva, 1995*.

Fuafuaga Faataatitia a le Ofisa o Faigafaiva




O auunaga a le Vaega o Faigafaiva i lalo o le Polokalame Faasao e aafia ai le tuuina atu ai o faamatalaga faapea fautuaga aua le malamalama atili o le afioaga i leni tulafono.

6.4 Suesue Tulaga Talafeagai o le Gataifale mo le Faia o se Ogasami Faasao

O se vaega o le gataifale ua faasaoina, e tatau ona le toe faatinoina ai ni faigafaiva. O le avea o lea vaega o le gataifale ma ogasami faasao e tatau ona malu puipuia lona siosiomaga. O autu taua o lenei ogasami faasao, e faasaoina ai amu ma a'au faapea i'a ma figota ina ia mafai ona maua e nei meaola se nofoaga malu e ola, tautuufua ma fanafanau ai ma tafea atu o latou o latou fua-fanau ma faatupuina ai meaola o le sami.

Fuafuaga Faataatitia a le Afioga

E ao i le afioga ona galulue faatasi ma:

-  lagolagosua i le afaigaluega a le Ofisa o Faigafaiva i le faatinoina o suesuega i le gataifale mo se vaega talafeagai e avea ma ogasami faasaoina;
-  talanoaina ma auilili le lipoti ma ia faia se faaiuga i le faavaeina o le vaega faasaoina;
-  ia faatinoina loa fuafuaga mo le faavaeina o le vaega faasao e pei o le mata'itūina, tausiga ma le pulea tatau o se vaega ua filifilia.

- i) O le isi laasaga, ia faasalalauina i le ea maliliega a le afioga ua folasia e faatatau i le ogasami faasaoina.
- ii) O tagata fagogota uma e tatau ona 20 iata le mamao o le vaega o lo o fagogota ai mai le ogasami faasao.
- iii) E le gata foi i lea, ae ua faaalua e le Komiti le faia o ni laau (po'o pine) ini vaega se lua e fai ma faailoilo o le ogasami faasao.
 - a) O le faailoga muamua e faailoa ai le ogasami faasao;
 - e) O le faailoga i tua, e 20 iata mai tua o le faailoga muamua o le Faasao e faasa ma faagata ai le au-faifaiva mai le sopo/fagota atu i totonu o le ogasami faasaoina.

6.4.1 Tulafono

Mo taganuu o Fagamalo faapea ai faifaiva mai isi afioga:-

“Ua matua faasaina lava soo se tagata o Fagamalo faapea nisi mai isi afioga ona toe fai ni faigafaiva ma soo se isi lava ituaiga o fagotaga i le vaega o le aloalo ua faasaoina ma faailogaina i le gataifale o Fagamalo”.

O le puipuiga ma le faamamaluina o lenei tulafono o le a i aao o alii ma faipule ma le afioga o Fagamalo.

6.4.2 Faasalaga

Mo soo se tagata o Fagamalo e maua ua ia solia lenei tulafono, o le a tuuina atu pea i a'ao o Alii ma Faipule, ae mo tagata mai isi afioga, o le a molia i *Tulafono Laiti* a lenei afioga.

Fautuaga

Ua fautuaina e le Komiti le faamamaluina o le tulafono e faasaina ai soo se tasi ona toe fagotaina le vaega ua faasaoina e le afioga.

Fuafuaga Faataatitia a le Ofisa o Faigafaiva

E ao i le Ofisa o Faigafaiva ona:

- ✎ faatinoina le suesuega o le tulaga o se vaega o le gataifale e avea ma vaega faasaoina a'o le'i maea le masina o Me, 1997;
- ✎ saunia se lipoti ma tuuina aloaia atu i le Komiti o le Faasao ma le fonu a alii ma faipule o Fagamalo;
- ✎ tuuina atu ni fautuaga ma ni faamatalaga mo le tausiga, pulea tatau ma le vaaia lelei o le ogasami faasao o le gataifale a le afioaga.

6.5 Suesueina le Tulaga Talafeagai o le Gataifale mo le Tufaina atu ma le Faatoagaina o l'a ma Figota

Oto'otoga

O le tufaina atu o figota e faatatau lea i le avanoa e aumaia ai ni figota mai se isi atunuu ma tufa atu e faaola i se ogasami ua talafeagai ma le ola lelei o nei figota. O le faatoagaina e faatatau i le faaolaina o i'a ma figota e le gata i le sami ae i vaimagalo o iai i le afioaga pe a talafeagai. O le tufaina atu o figota mo le faatoagaina i ogasami faasao o le isi lea auala e toe atinae ma faatupuina ai i'a ma figota aua le fofoga taumafa o le afioaga. O nei auala faa-atinae e moomia ai le galulue filiga ma le faamaoni o le afioaga ina ia ausia se taunuuga lelei.

6.5.1 Tufaina atu o Figota mo le Faaolaina ma le Faatoagaina i Faasao

O le tufaina atu o figota e pei o faisua ma aliao i afioaga o le taumafai lea e toe faatupulaia le faitau aofai o nei ituagia figota ua faaitiitia i sami o Samoa. I le tele o atunuu o le Pasefika, ua mautinoa ai le tele o ni faamanuiaga na mafai ona seleseleina e nei atunuu. I Fiti, e le gata i le aoga o le aano o le aliao e avea ma mea taumafa ae faapea le aitigi ua mafai ona faatauina atu i isi atunuu i fafo e gaosi ai faamau o ofu i fale gaosi oloa. I le 1990, na tufaina atu ai i sami o le tama'i motu o Namua i Aleipata aliao e 40, ma e le o ma iloa tonu le tulaga ua oo iai nei aliao.

I le tele o vaega o aloalo ma a'au o Samoa o lo o maua ai figota e pei o le pae, asi ma tugane. O nei figota ua mautinoa lo latou faaitiitia talu ai o le soona fagotaina e tagata mo le fofoga taumafa ma le faatau atu ia maua ai le seleni. E le gata i lea ua faapena foi ona faatamaina o latou nofoaga e afā malolosi. I le tele o nofoaga, ua le toe maua ai ni figota, pau le faamoemoe o le aumaia lea o ni figota mai isi atunuu ma tufaina atu iai aua le faaolaina i nei vaega o le gataifale.

Na faatalosagaina foi e le Komiti le faia o se aoaoga ma le tuuina atu o ni faamatalaga mo le faaolaina i vaimagalo o i'a e pei o le tilapia i totonu o Fagamalo. O le a iloiloaina foi e le Ofisa o Faigafaiva le tulaga talafeagai o le faatinoina o lenei ituaiga o atinae i totonu o le afioaga. E le gata foi i lea, ae ua faapena foi ona faatalosagaina nisi o ituaiga o figota pe mafai ona faaolaina i le gataifale o le afioaga e pei o le faisua, aliao, maso (mussel) ma le tio (oyster) e pei ona sa iai muamua.

Fuafuaga Faataatitia a le Afioaga

E ao i le afioaga ona:

- ✎ galulue faatasi ma le aufaigaluega a le Ofisa o Faigafaiva i le faatinoga o le suesuega ma le iloiloaina pe talafeagai ma lelei le gataifale o Fagamalo i le tufaina atu ma le faafaatoagaina o i'a ma figota;

- ✎ auiliiliina se lipoti i suesuega o le talafeagai o le gataifale, ma ia faia se faaiuga i le faatinoina o nei atinae i totonu o Fagamalo;
- ✎ galulue faatasi mo le leoleoina o nei atinae ma le vaaia o tagata o loo latou faatamaia ma solia tulafono.

Fuafuaga Faataatitia a le Ofisa o Faigafaiva

- ✎ o le a tuuina atu ni fautuaga ma ni faamatalaga i atinae tilapia faapea le tausiga ma le fagagaina o ia i'a ua faaolaina i vaimagalo;
- ✎ pe a tusa ai ma fuafuaga, o le a tuuina atu i'a poo figota i ogasami ua fuafuaina atoa ai ma le faatoagaina i vai o loo iai nei i totonu o le afioaga pe a talafeagai;
- ✎ fesoasoani i le vaaia ma le mata'itūina o le sologa lelei o le tuputupu ae o figota i le atinae.

6.6 Ogasami Faatagaina mo le Fagotaina o le Matalelei/Matamalū

Otootoga

Sa faaalua e sui o le Komiti a le afioaga o le matalelei po o le matamalū sa molimauina le tulaga ola lelei i gataifale o le afio'aga. E le gata i lea, ae na pau lenei o le figota sa fagota tasi atu e nisi afio'aga tua'oi, ona o le ola tele i le aloalo o Fagamalo. Sa latou faaalua ai foi o se tasi lenei o faigafaiva sa faatama'ia ai e le afaifaiva ia amu sa ola i le aloalo o le afioaga. O le taimi nei foi, o loo faaauauina pea nei ituaiga o fagotaga i totonu o le afio'aga, ma o lea sa iai loa se naunauta'iga i le Komiti e ao ona faia loa iai se fuafuaga.

Fuafuaga Faataatitia a le Afioaga

Ua iai se finagalo o le afioaga ma le Komiti, ia faia se fuafuaga i lenei ituaiga faigafaiva. Ua le gata ina faatama'ia ai amu, ae o le a faaititia ai i'a ma figota mo le fofoga taumafa o le afio'aga.

Fautuaga

Sa talosagaina e le komiti a le afio'aga le faia o se tulafono e taofia ai le soona fagotaina o lenei figota e nisi mai isi afioaga. Ua faia lenei faatatau, ona o lo latou naunauta'iga ia faasaoina lo latou gataifale atoa ai ma le taofia o le faaleagaina o amu. O aiāiga foi o lenei tulafono, e faasino tonu i le vaega o le gataifale o le afio'aga o le a faasaoina.

6.6.1 Tulafono

Mo taganuu o Fagamalo faapea faifaiva mai isi afioaga:-

“Ua matua faasaina lava ona toe fagotaina le matalelei i totonu o le aloalo ma le a'au o lenei afio'aga i le Ogasami Faasao sei vagana ai le vaega o loo faatagaina mo lenei ituaiga faiva.”

Soo se tasi lava ua fia faia lenei ituaiga faiva i gataifale o Fagamalo, e ao ona faafesootai muamua se tasi o le komiti mo se faatagana. O lenei foi faaaliga, e aofia ai soo se tagata lava o le afio'aga o Fagamalo ma isi nuu ese.

O le puipuiga ma le faamamaluina o lenei tulafono o le a i aao o alii ma faipule ma le afioaga o Fagamalo.

6.6.2 Faasalaga

Mo soo se tagata o Fagamalo e maua ua ia solia lenei tulafono, o le a tuuina atu i a'ao o Alii ma Faipule, ae mo tagata mai isi afioaga, o le a molia i *Tulafono Laiti* a lenei nuu.

Fuafuaga Faataatitia a le Ofisa o Faigafaiva

O le a fesoasoani le Ofisa o Faigafaiva mo le faatinoina o fuafuaga faataatitia a le afioaga e ala atu i le Polokalame o Faasao faapea le tuuina atu o faamatalaga ma fautuaga mo le faamautuina o fuafuaga ma nei tulafono. Sa faaalua e le Ofisa o Faigafaiva i le komiti a le afio'aga, le tulaga o loo iai le tulafono e pei ona ta'ua ai le matalelei, ona e le mafai ona faamalosia ma faasalalauina e le Vaega o Faigafaiva lenei tulafono ona o lo'o aofia ai na o se vaega o le atunuu peitai o lo o mafai ona faamamaluina i lalo o a latou Tulafono Laiti.

6.7 Taofia le Faatafunaina o le Gataifale: Faasaina le Lafoai o Otaota ma Lاپisi i le Matafaga ma le Sami

Otootoga

O se tasi lenei o vaega o loo aofia i tulafono ua maea ona faasalalauina ma ua ioeina e le Komiti ina ia toe faaopoopoina lona faasalaga ina ia mafai ona saga unaia pea le afioaga mo le māmā lelei o lona siosiomaga.

O le lafoai o otaota i le sami ma le matafaga o lea:

- ☞ avea ma mafuaaga ma nofoaga e tautuufua ai namu;
- ☞ faamanu'alia pe lavevea ai tagata lautele i atigi apa ma atigi fagu, aemaise le avea ma puna'aga o faama'i;
- ☞ avea ma nofoaga e le talafeagai mo meaola o le sami;
- ☞ atagia ai le le faatauina e le afio'aga o le gataifale ma le tele o ona alamanuia ma nisi o ona tamaoaiga.

Fuafuaga Faataatitia a le Afioaga

O le faamoemoe o le afioaga ia foia nei faafitauli ma ia fausiaina pe iai se nofoaga e lafoai uma iai otaota a le afioaga atoa. Faataitaiga, e mafai ona lafoai otaota i se lua ma ufiufi malu aua le saogalemu mai faama'i ma siama feavea'i. Talu ai e mafai ona tafe ma ulu atu le oona o lapisi poo vaila'au o loo lafoaiina i lea lua, o lea e fautuaina ai le afioaga, ina ia eliina se lua i se nofoaga mamao esee mai puna vai taumafa faapea le sami.

O le fautuaga a le Komiti, o le faia ma faamauina lea o se tulafono e taofia ai tagata Fagamalo ma isi afioaga tua'oi ona toe lafoai ni otaota ma lapisi i le gataifale.

6.7.1 Tulafono

Mo taganuu o Fagamalo faapea tagata ese mai isi afioaga:-

“Ua matua faasaina lava ona toe lafoai otaota ma lapisi e pei o atigi apa, atigi fagu, uamea, pepa iila ma isi ituaiga i le matafaga ma le sami o Fagamalo.”

O le pui-puiga ma le faamamaluina o lenei tulafono o le a i aao o alii ma faipule ma le afioaga o Fagamalo.

6.7.2 Faasalaga

O soo se tasi e solia lenei tulafono o le a faasalaina i le \$100.00 a le aiga. A le usita'ia loa lenei faasalaga, o le a tuuina atu i le pule a alii ma faipule pe molia loa i Tulafono Laiti a le afioaga.

Fuafuaga Faataatitia a le Ofisa o Faigafaiva

O le a fesoasoani le Ofisa o Faigafaiva e ala atu i lana polokalame Faasao faape le tuuina atu o faamatalaga ma fautuaga mo le faamautuina o fuafauga a le afioaga.

6.8 Ia Aoina ma Faatama'ia Alamea

O le alamea o se meaola o le ituaiga o le aveau, ma e nofo pe maua i luga o a'au ma amu i le sami. O le alamea na te aina pe ola i meaola ninii ua ta'ua o polipe o loo fausiaina ai amu. A oo ina faateleina lenei meaola o le alamea, o le a faapena ona latou tapēina ma faatamaia a'au ma amu o lo o pipii ma ola ai. O le popolega o le afioaga, o le a i se tulaga pagatia le tele o meaola i le aloalo o loo faalagolago i le a'au ma amu mo meaai ma nofoaga e ola ai. E le mafai ona faaumatia pe tapēina lenei meaola i le sami. Aua foi, e mafai e le alamea ona toe ola pe tatupu ona itutino pe ola mai ai isi alamea fou seia vagana lava ua aumaia i le pa'umatū ma faamamagoina ai i le la, pe susunuina foi.

E pei ona faailoa mai e aumaga ma le au tautai, o le alamea o se tasi lea o faafitauli mo faigafaiva o loo iai nei i gataifale o Fagamalo.

Fautuaga Faataatitia a le afioaga

Ia aoina ma faaputuina e le afioaga alamea pe a latou va'aia pe tau foi iai i taimi o fagotaga. Ia aumaia i uta nei meaola ma tanumia pe faamagoina ai. Sa fautuaina foi ma faaali finagalo o alii ma faipule o Fagamalo, o le a taumafai le aumaga atoa ma le au tautai e latou te aoina mai le alamea ma faatamaia i uta.

Taimi Fautuaina

Ia faaaau le aoina o lenei meaola faalafuā i taimi uma ma aso uma. O lenei taumafaiga, o se auala e puipuia ai amu, siosiomaga ma le tamaoaiga o le gataifale.

Fuafuaga Faataatitia a le Ofisa o Faigafaiva

O le faamalamalamaina o ni fesili e faatatau i lenei fuafuaga i le aoina o le alamea, sa faapupulaina ai i le afioaga e leai se polokalame a le Malo e totogi ai le aoina ma le faatamaia o le alamea. Ae e fesoasoani pea le Ofisa o Faigafaiva e tuuina atu faamatalaga ma fautuaga mo auala e tineia ai le alamea mai gataifale o Fagamalo.

6.9 Una'ia Faigafaiva i Tua'au ma Faia Aoaoga mo Faigafaiva

Otootoga

E mafai ona toe faaleleia le tamaoaiga o i'a ma figota maua i luga o le a'au ma vaega o le gataifale ua faaleagaina pe afai ae faaitiitia le soona fagotaina o le aloalo, ae una'ia fagotaga i ogasami mamao po o tua'au.

Ua iai le talitonuga o le Komiti e ao ona unaia ma faamalosi faigafaiva i tua'au ma a'au mamao ina ia tu'umāmāina ai le fagotaina o i'a ma figota o le a'au ma le aloalo. Ua le gata foi i lea, ae o le a mafai ona maua le avanoa e toe faatupula'ia ma faaleleia ai le tamaoaiga o le tele o vaega o le aloalo ma le gataifale ua faaleagaina. Pau lona faafitauli o le toatele o le nuu e leai ni vaa e talafeagai mo fagotaga i tua'au.

Fuafuaga Faataatitia a le afioaga

Ua talosagaina e le afioaga le Ofisa o Faigafaiva mo ni o latou vaa fagota se lua, ma ia faatinoina se aoaoga i auala tau faigafaiva e aoaoina ai le autautai o le nuu.

Vaa Fagota i Tua'au

O le leai o ni vaa talafeagai mo fagotaga i tua'au, o le a faa-vaegase ai lenei fuafuaga e una'ia ai faigafaiva i tua'au. E le o iai se vaa fagota i le va o le 'alia ma le paopao, ae o se vaa i lea va ua talitonuina e talafeagai mo faigafaiva i tua'au. I saililiga a le Ofisa o Faigafaiva i se vaa talafeagai, ua filifilia ai le va'a e i la va o le 14-17ft, ma o lona tau e le itiiti ifo o le \$10,000 tala pe a tuufaatasi iai ma lona afi. O lenei ituaiga vaa, e mafai ona faaauvaaina e ni tagata se toalua pe toatolu foi mo faigafaiva i tua'au. O le a faia ni aoaoga mo le saogalemu i luga o le sami, teuina ma le va'aia lelei o i'a faapea le tausiga o vaa ma mea fagota.

I le faatalatalanoaga i le toe iloiloina o lenei Taiala i aso 20 o luni 2008 na faaalai ai e le Vaega o Faigafaiva o lenei polokalame e fesoasoani ai mo vaa fagota ua le toe mafai i vaitaimi nei. Peitai, o lo o iai fesoasoani tau tupe i isi faalapotopotoga e pei o Malo Aafaatasi (UNDP) ma le luni a Europa (EU) e agavaa ai afioaga e mafai ona fesoasoani ai i ni faatupega e manaomia.

Fuafuaga Faataatitia a le Ofisa o Faigafaiva

O le a iloiloina e le Ofisa manaoga tau i auala faa-faigafaiva e ao ona fesoasoani ai e a'oa'oina ai le mamalu o le au tautai o le afio'aga. O itu taua o le a aafia i nei a'oa'oga mataupu e pei o le teuina ma le va'aia lelei o i'a, saogalemu i luga o le sami, tausiga o afi o vaa ma isi lava mataupu taua.

6.10 Faasalalauina Tulafono a le Afioaga

Otootoga

Na fautuaina e le Komiti le faasalalauina o tulafono a le afioaga ua faataatitia mo le faamoemoe ia puipuia le siosiomaga o le gataifale ma ona tamaoaiga faapea faigafaiva. Sa talanoaina foi e le Komiti, e ao ona toe faasalalauina tulafono autu o faigafaiva faatasi ai ma isi tulafono pei ona pasia i lenei Taiala aua le silafia e tagata lautele e tusa o aiāiga uma o nei tulafono.

O le fonotaga i le Aso 9 o Aperila 1997, na faatalosagaina ai e le Komiti a le afioaga se fesoasoani a le Malo mo le faasalalauina o nei tulafono e ala atu i le Ofisa o Faigafaiva, ina ia mautu lelei ma faataunuaina lea fuafuaga.

Fautuaga ma le Faamoemoe

Ina ia silafia ai e le atunuu aemaise ai o afioaga tuaoi nei tulafono, ma ia faapea foi ona nofouta i ai e tusa o faasalaga ua āiāia e alii ma faipule o Fagamalo.

Autu o le Faasalalauaga: *"Puipuiga o le Gataifale o Fagamalo"*.

Taimi Fautuaina

O le faasalalauina o tulafono uma atoa ma ona āiāiga o le a faataunuaina pe a maea ona pasia e le fonu a alii ma faipule o le afioaga.

Fuafuaga Faataatitia a le Ofisa o Faigafaiva

O le a fesoasoani le Ofisa o Faigafaiva i le tapenaina o tulafono a le afioaga aua le faasalalauina mo le silafia e le atunuu.

7 UPU MULIMULI


O le auai o le afioaga o Fagamalo i le polokalame mo le pulea tatau ma le vaaia lelei o i'a ma figota o le sami ua mautinoa le manuia o le afio'aga i ni tausaga o i luma. O le manuia ma le alualu i luma o lenei polokalame e faalagolago tele i le galulue faatasi o le afioaga, i le pule mamalu a alii ma faipule, komiti a tina ma tamaitai, aumaga aemaise o le Malo e tau ala atu i le Ofisa o Faigafaiva i le faatinoina o fuafuaga faataatitia ua maea soalaupule i le tele o fonotaga ma faatalatalanoaga sa faia.

O lenei polokalame o se galuega e umi se taimi e faatatali ai lona fua mai ae peitai ua mautinoa o le toe faaleleia ai lea o alamanuia o le gataifale e faalagolago iai le afioaga. O i latou o le a talisapaia ma 'ae'ae i nei manuia, o tagatanuu lava o le afioaga faapea tupulaga i le lumanai. O lea ua a'e ai se tofa i le afio'aga e galulue faatasi i lenei polokalame a le Malo ma Afioaga e fesoasoani ai e toe tapu'e mai le tamaoaiga o le gataifale ua tauau ina mou atu.

O fuafuaga faataatitia uma ua faamoemoe le afioaga e faatino ma ia faaauuina pe a pasia lenei Tusi Taiala, ma ia faia lenei ma auala e puipuia ai le siosiomaga ma punoa o le gataifale.


8 SUI AUAI I FONOTAGA MA FAATALATALANOAGA


Sui sa auai i le fonu faai'u e taliaina lenei taiala (17 Aperila 1997)

 Alii ma Failauga o le Nu'u faatasi ai ma le Pulenuu

Sui o le Ofisa o Faigafaiva

 Savali Time

 Siamupini Iosefa

 Peter Matthew

Alii Ofisa Sinia

Sui Alii Ofisa Sinia o Faigafaiva

Alii Ofisa

👏	Loimata Leena	Tamaitai Ofisa
👏	Aiolupo F. Kolia	Failauga mo le Ofisa i Savaii
👏	Totive Aloaina	Alii Ofisa
👏	Uelese Tufuga	Alii Ofisa
👏	Mikaele Lafaele	Alii Ofisa Lagolago
👏	Mamoe Malolo	Alii Ofisa Lagolago
👏	Maatui Filifili	Alii Ofisa Lagolago

Sui Filifilia o le Komiti Faufautua mo le Pulea Tatau ma le Vaaia Lelei o le Faasao o le Gataifale

Aloaina Ro	Aivale Aloaina Ro	Ricky Aloaina
Falevalu Faamoetauloga	Faillelei Tulai	Faasisila Togiaso
Sua Fasi	Gagau Meafua	Fagalele Kitara
Faifagogo Pasi		

Sui auai i le fono e toe iloiloina ma le toe faaauauina o le Faasao – 20 Iulai 2008

👏	Afiafi Aloaina (Peresitene)	Tanumua Fainuu	Faiva Iosefa Sao
👏	Taumuaalii Filifili	Faifagogo Lafoga	Malaga Seuamuli
👏	Seuamuli Fua	Seuamuli Uluita	Seuamuli Amosa
👏	Seuamuli Eti	Seuamuli Pogisa	Seuamuli Fasi
👏	Faamoe Lasalo	Muga Seuamuli	Gafoi Tini
👏	Lepulu Taulaga	Mataiao Lene	Lesulu Tala
👏	Sauao Falevalu	Faamoe Faafetai	Leasu Malaefata
👏	Tulia Tauoa	Sitivi Faamoe	Taumaoe Faamoe
👏	Fai Faamoe	Lio Faifaagu	Tapu Faaopoopo
👏	Puiai Faasisila	Pula Pumaa	Nulale Kosene
👏	Peo Afoa		

Sui o le Ofisa o Faigafaiva

👏	Olofa Tuaepepe (Tamaitai Ofisa Sinia Mauuluga)
👏	Tauaefā Autalavou Tauaefā (Alii Ofisa Sinia)
👏	Seuamuli Totive Aloaina (Alii Ofisa Sinia)
👏	Taitoa Matautia (Alii Ofisa Lagolago)
👏	Solomona Tufuga (Alii Ofisa Lagolago)
👏	Vaai Tua (Alii Ofisa Lagolago)

Sui Filifilia o le Komiti Faufautua mo le Pulea Tatau ma le Vaaia Lelei o le Faasao o le Gataifale

Aloaina Afiafi (7752857)	Faamoe Tauloa Neru (Pulenuu)
Seuamuli Uluita	Faamoe Lagi
Lepulu Taulaga (54262)	Falevalu Sauao
Puiai Faasisila	Tanumoa Malo
Taumuaalii Filifili	Faleni Tulia